

摘藻堂四庫全書薈要

史部

欽定四庫全書薈要

史部

宋史紀事本末卷十二

詳校官員外郎臣楊世綸



欽定四庫全書薈要卷八千七百九十二

宋史紀事本末卷十二

明馮琦撰

陳邦瞻輯

金滅遼

神宗熙寧七年十二月遼女真部節度使烏古斡死子  
合理博嗣初女真之先蓋古肅慎氏世居混同江之東  
長白山鴨綠水之源南隣高麗北接室韋西界渤海鐵

甸東憑海後漢謂之挹婁元魏謂之勿吉隋唐謂之靺

鞨姓挐又號完顏氏數十傳後漸微唐貞觀默爾根來

朝自是中國始聞其名開元中其長來朝拜為勃利州

刺史遂置黑水部以部長為都督朝廷為置長史監之

五代時始稱女真其族分六部有黑水部其民在南者

繫籍于遼號熟女真在北者不籍于遼號生女真已而

避遼主宗真諱改曰女直又有曰黃頭女真其人慇朴

勇鷙謂之和勒博自東沫江之北寧江之東地方千餘里

自推豪俠為部長僻處契丹東北隅宋太宗建隆二年以馬入貢三年四年復遣使貢馬自是不絕太宗淳化二年首領伊勒錦等上言契丹怒其朝貢中國置三柵于海岸每柵置兵三千絕其貢獻之路乞發兵共平三柵太宗降詔撫諭而不為發兵真宗大中祥符三年契丹征高麗道由女真女真復與高麗合兵拒之天禧三年復遣使至自天聖後役屬契丹不復入貢至烏古斡能後屬諸部會遼五國富聶赫部節度使巴延瑪勒叛遼遼

將致討烏古鶻恐遼兵深入得其山川險易或將圖之  
乃告遼曰彼可計取也若用兵必將走險非歲月可平  
也遼從之烏古鶻因襲而擒之以獻遼主遼主召見燕  
賜加等授生女真部節度使始有官屬紀綱漸立矣然  
不肯受印繫遼籍其部內舊無鐵隣國有以甲冑往鬻  
者必厚價售之得鐵既多因以修弓矢備器械兵勢稍  
振前後願附者衆至是五國穆延部舍音貝勒復叛遼  
烏古鶻伐之舍音敗走烏古鶻將見遼邊將自陳敗舍

音之功道死子合理博襲為節度使

哲宗元祐七年夏四月遼女真部節度合理博死弟蒲  
拉舒嗣合理博生十一子長曰吳刺束一名烏雅舒次  
曰阿固達曰烏奇邁曰薩音曰斡薩曰烏珠阿曰烏古  
奈曰多昂摩曰扎拉曰烏特合理博疾篤呼弟盈格謂  
曰烏雅舒柔善若辦集契丹事阿固達能之遂卒母弟  
蒲拉舒襲為節度使合理博嚴重多智每戰未嘗被甲  
襲位之初內外潰叛合理博乃因敗為功變弱為強遂

破和諾克薩克達烏春烏木罕基業始大建官屬統諸部其官之長皆稱貝勒

紹聖三年二月生女真節度使蒲拉舒死弟盈格嗣以兄和琢子薩拉噶為國相時赫舍哩部阿蘇有異志盈格召之阿蘇與部人穆都哩阻兵為難盈格自往伐之至阿蘇城阿蘇往訴于遼遼遣使止盈格勿攻盈格留和琢守阿蘇城而還

徽宗崇寧元年冬十月遼將蕭哈哩叛遼亡入女真阿



克占部遣其族人烏達喇至女真約同舉兵節度使盈格  
執之時遼主命盈格討哈里盈格募兵得千餘人兄子  
阿固達曰有此甲兵何事不可圖也遂次混同江蓋先  
是女真甲兵未嘗滿千也至是遼兵追哈里者數千人  
而不能克盈格謂遼退爾軍我當獨取哈里遂使阿固  
達與戰執而殺之因大破其黨函哈里首獻于遼遼主  
大喜錫予加等盈格自是知遼兵之易與益自肆矣  
二年冬十月生女真部節度使盈格死兄子烏雅舒嗣

時高麗復與女真通好女真雖舊屬高麗然不相通者  
且久會高麗醫者至女真還言于高麗王曰女真居黑  
水部者部族日強兵益精悍其王乃通使于女真自是  
來往不阻

政和二年二月遼主如春州至混同江釣魚界外生女  
真部長在千里內者以故事皆來朝適遇頭魚宴酒半  
酣遼主命諸部次第起舞至阿固達辭不能但端立直  
視遼主諭之再三阿固達終不從他日遼主密諭北院

樞密使蕭奉先曰阿固達跋扈如此可托以邊事誅之  
否則必遺後患奉先曰彼僉人不知禮義且無大過而  
殺之恐傷向化心設有異志叢爾小國亦何能為遼主  
乃止阿固達之弟烏奇邁瑪哈胡舍等嘗從遼主獵能  
呼鹿刺虎搏熊遼主喜加以官爵阿固達歸疑遼主知  
其異志且以遼主淫酗不恤國政遂稱兵先併旁近部  
族女真趙三阿果展拒之阿固達虜其家屬二人走訴  
咸州詳衮司送北樞密院蕭奉先作常事以聞遼主命

送咸州詰責欲使自新後數召阿固達阿固達不至一日率五百騎突入咸州吏民大驚翌日赴詳衮司與趙三等面折庭下阿固達不屈送所司問狀一夕遁去遣人訴于遼主言詳衮司欲見殺故不敢留自是召不復至矣

三年十二月生女真節度使烏雅舒死弟阿固達自稱達貝勒遼使愛錫拉布往謂之曰何故不告喪阿固達曰有喪不能吊而乃以為罪乎

四年冬十月女真阿固達叛遼取寧江州先是遼主好畋獵淫酗怠于政事每歲遣使市名鷹海東青于海上道出生女真使者貪縱徵索無藝女真厭苦之及阿蘇奔遼烏雅舒屢以為請遼主不遣阿蘇遂以為辭稍稍拒市鷹使者及阿固達襲位相繼遣普嘉努舒古特等索阿蘇遼主終不許舒古特歸具言遼主驕肆廢弛之狀阿固達乃召其所屬使備衝要建城堡修戎器遼主使侍御愛錫拉布往詰之阿固達曰我小國也事大國不

敢廢禮大國德澤不施而逋逃是主以此字小能無望  
乎若還阿蘇朝貢如故不然城未已也愛錫拉布還遼主  
遂發渾河北諸軍益東北路統軍司阿固達聞之謂其  
下曰遼人知我將舉兵集諸路軍備我我先發制之  
無為人制乃與薩噶子尼瑪哈等遂集所屬諸部兵以  
尼楚赫洛索多昂摩等為將而使博勒郭徵伊拉路迪古  
萬兵九月阿固達率兵進次寥晦城諸部兵皆會于拉  
林水得二千五百人數遼之罪告于天地曰世事遼國

恪修職貢定烏春烏木罕之亂破蕭哈里之衆有功不  
省而侵侮是加罪人阿蘇屢請不遣今將問遼之罪天  
地其監佑之遂命諸將傳梃而誓至遼界遇渤海軍耶  
律色錫墜馬阿固達射殺之阿固達之子幹布無數騎  
陷遼圍中阿固達救之免胄戰或自旁射之阿固達顧  
見射者一矢而斃謂其下曰盡敵而止衆從之勇氣百  
倍遼軍大奔蹂踐死者十七八薩拉噶在別部聞之使尼  
瑪哈及固新來賀勸其稱帝阿固達曰一戰而勝遂稱

大號何示人淺也進軍寧江州填塹攻城寧江人自東

門出阿固達邀擊盡殪之遼統軍司以聞遼主射鹿于

慶州畧不介意惟遣海州刺史高仙壽應援而已十月

朔寧江州陷遼防禦使大約什努被獲阿固達陰縱之

使招諭遼人遂引兵還初女真部民皆無徭役壯者悉

為兵平居則漁畝射獵有警則下令徵之凡步騎之仗

糗皆自備焉其部長曰貝勒行兵則稱曰明安穆昆明

安猶千夫長穆昆猶百夫長也凡以衆降附者率以明



安穆昆之名授之

十一月遼主聞寧江州陷召羣臣議漢人行宮副部署  
蕭陶蘇幹曰女真雖小其人勇而善射我兵久不練若  
遇強敵稍有不利諸部離心不可制矣今莫若大發諸  
道兵以威壓之北院樞密使蕭達爾丹曰如陶蘇幹之  
謀徒示弱耳但發滑水以北兵足以拒之乃以司徒蕭  
嗣先為東北路都統蕭托卜嘉副之發契丹奚軍三千及  
中京禁兵等七千屯珠赫店阿固達卒衆來禦未至混

同江會夜阿固達方就枕若有扶其首者三寤而起曰  
神明警我也即鳴鼓舉燧而行黎明至混同江遼兵方  
壞凌道阿固達選壯士十人擊走之因帥衆繼進遂登  
岸與遼兵遇會大風起塵埃蔽天阿固達乘風奮擊遼  
兵潰將士多死其獲免者十有七人樞密使蕭奉先嗣  
先兄也懼嗣先得罪輒奏東征潰軍所至劫掠若不  
肆赦恐聚為患遼主從之嗣先但免官而已自是諸軍  
相謂曰戰則有死無功退則有生無罪故士無鬪志遇

敵輒潰阿固達進襲遼蕭特哩于沃楞樂東殺獲甚衆  
遼人嘗言女真兵滿萬則不可敵至是始滿萬云 十  
二月遼賓祥咸三州及圖哩部叛降女真圖哩王奚和  
勒博未幾逃歸

五年春正月壬申朔女真完顏阿固達稱帝國號金先  
是阿固達既屢勝遼其弟烏奇邁率將佐勸其稱帝阿  
固達不許鄂蘭哈瑪爾普嘉努尼瑪哈等復以為言至是阿  
固達始用鐵州降人楊朴策遂稱皇帝即位且曰遼以

賓鐵為號取其堅也賓鐵雖堅終亦變壞惟金不變不壞金之色白完顏色尚白況所居愛新水之上於是國號大金建元收國更名昊追尊祖函普以下皆為帝以烏奇邁為阿木班貝勒薩拉噶舍音為固倫貝勒其國語謂金為愛新謂尊大為阿木班謂國相為固倫舍音亦阿固達弟薩拉噶烏古羅之孫也尼堪又名尼瑪哈亦其國語云遼主使僧嘉努持書往金議和使為屬國阿固達遣薩喇復書云若歸叛人阿蘇遷黃龍府於別

地然後議之金主自將攻遼黃龍府進薄益州州人走  
保黃龍金取其餘民而去遼遣都統額爾德左副統蕭  
伊薛右副統耶律卓諾都監蕭謝佛哩將騎二十萬  
步卒七萬戍遼且屯田以為持久計金主聞之率衆趨  
達羅克城登高望遼兵若連雲灌水狀顧謂左右曰遼  
兵心二而情怯雖多不足畏遂趨高阜為陣穆哩庫以  
右翼先馳遼左軍左軍却洛索尼楚赫衝遼中堅陷陣  
力戰尼瑪哈以中軍助之遼兵遂敗金兵乘勢追躡至

其營會日已暮圍之黎明遼軍潰圍出金人逐北至阿  
魯岡遼步卒盡殪耕具數千皆為金人所獲是役也遼  
人本欲屯田且戰且守故併其耕具皆失之 三月遼  
使卓諾等六人齎書使金猶斥阿固達名冀其降金  
主以為書辭慢侮留五人獨遣卓諾還報書亦斥遼  
主名諭遼主降 六月遼復遣使如金金主留其使蕭  
齊喇不遣 八月遼主下詔親征女真率蕃漢兵十餘  
萬出長春路命蕭奉先為御營都統耶律卓諾副之以

精兵二萬為先鋒餘分五部北出駱駝口別以漢步騎

三萬南出寧江州發數月糧期必滅女真 九月金主

攻遼黃龍府次混同江無舟以渡金主使一人導前乘

赭白馬徑涉曰視吾鞭所指而行諸軍隨之以濟水及

馬腹既濟使人測其渡處深無涯涘於是遂克黃龍府

遣蕭齊喇還遼曰若歸我叛人阿蘇即當班師遼師渡

混同江副都統卓諾與耶律淳妃弟蕭迪里及其甥蕭

延留等誘將士亡歸謀迎立淳淳興宗之孫也初昭懷

太子得罪道宗欲立淳為太子群臣諫乃止遼主即位寵待加厚號其父和囉噶為太叔封淳越王留守京東於是卓諾遣廸里以其謀告淳淳曰此非細事主上自有諸王當立北南面諸大臣不來而汝言及此何也密令左右拘之有頃遼主使行宮賓達爾伊遜等持書至備言卓諾之謀淳即斬廸里等携其首單騎詣廣平淀待罪遼主遇之如初卓諾知淳不見聽乃率麾下掠取上京府庫財物至祖州帥其黨告太祖廟數遼主過惡移



檄州縣遂結渤海群盜至數萬趨廣平犯行宮不克北  
趨降虜山順國女真阿果展以三百騎一戰勝之擒其  
貴族二百餘人並斬以徇餘得脫者皆奔女真卓諾詐  
為使者欲奔女真為邏者所獲縛送遼主所腰斬於市  
十二月金主聞遼主親征乃聚衆以刀勢面仰天慟哭  
曰始與汝等起兵蓋苦契丹殘忍欲自立國今天祚親  
至奈何非人人死戰恐不能當也不若殺我一族汝等  
迎降轉禍為福諸軍羅拜曰事已至此惟命是從金主

遂帥師迎敵遼主自將至圖敏駙馬蕭特默等將騎兵五萬步卒四十萬至沃楞灤金主行次鴨綠與其臣謀曰遼兵號七十萬其鋒不可當吾軍遠來人馬疲乏宜駐於此深溝高壘以待之會獲遼督餉者知遼主以卓諾反西還已二日矣諸將請乘怠擊之遂追遼主及於和斯布達岡金主曰彼衆我寡兵不可分視其中軍最堅主必在焉敗其中軍可以得志使右翼先戰左翼合而攻之遼兵大潰枕藉相屬百餘里獲輿輦帟幄兵械

軍資他寶物馬牛不可勝紀蕭特默焚營而遁金主亦退

六年春正月遼東京留守蕭保先嚴酷渤海苦之是月朔夜半有惡少年十餘秉酒執刀踰垣入府刺殺保先戶部使大公鼎聞亂即攝留守事與副留守高清明集奚漢兵千人盡捕其衆斬之撫定其民裨將渤海高永昌時以兵三千屯八甌口見遼政日衰金兵方強遂誘渤海并戍卒入遼陽據之旬日之間遠近嚮應有兵八

千人因僭號稱隆基元年遼主遣蕭韓嘉努張琳討之  
夏四月金人攻高永昌殺之遂取遼東京州縣初永昌  
使人求援于金且曰願并力以取遼金主使呼實布謂  
永昌曰同力取遼固可東京近地汝輒據之以僭大號  
則不可若能歸款當授王爵永昌不從金主乃遣韓魯  
帥諸軍攻永昌與遼將張琳等遇戰敗之遂取瀋州永  
昌大懼率衆拒金過於活水金師既濟永昌之軍不戰  
而却遂北至遼陽城下明日永昌盡帥其衆與金戰又

大敗遂以五千騎奔長松遼陽人托卜嘉執永昌以獻  
金主殺之於是遼之東京州縣及南路繫遼女真皆降  
於金金主以斡魯為南路都統鄂楞知東京事 六月  
遼以耶律淳為元帥

七年八月癸亥遼主自燕至陰涼河募遼東人為兵使  
報怨于女真號曰怨軍凡八營二萬八千餘人屯衛州  
蒺藜山以渤海鐵州人郭藥師等為帥 十二月遼耶  
律淳遣金咸州都統烏楞古書議和烏楞古告于金主

金主猶以歸薩喇及阿蘇為言淳軍至疾慕山烏楞古  
及知東京事鄂楞等攻顯州襲破遼怨軍帥郭藥師遂  
進與淳戰淳敗走烏楞古追至額勒金陂拔顯州於是  
乾懿壕復成川惠七州皆降金 遼東鐵州人楊朴言  
于金主曰自古英雄開國必先求大國封冊金主從之  
乃遣使求封冊于遼使至遼時遼東諸州盜賊蜂起掠  
民以充食樞密蕭奉先等勸遼主許之  
重和元年十二月遼大饑人相食

宣和元年三月遼遣使冊金阿固達為東懷國皇帝阿  
固達不受初遼遣耶律訥格如金議和金主復書曰能  
以兄事朕歲貢方物歸我中京上京興中府三路州縣  
以親王公主駙馬大臣子孫為質還我行人及元給信  
符并宋夏高麗往復書詔表牒則可既而訥格復至金  
使呼塔噶與俱如遼免取質子及上京興中府所屬州  
縣裁減歲幣之數且曰必以兄事我冊用漢儀如不可  
勿復遣使遼主從之凡七遣使如金議冊禮金乃使烏

凌噶贊謨如遼迎冊冊至金金主以無兄事之語又不稱大金而東懷乃小邦懷其德之義語涉輕侮乃復使贊謨如遼責其冊乖體式必如前書所定然後可從

八月金製女真字女真初無文字及獲契丹漢人始通契丹漢字金主遂命固新依倣漢人楷字因契丹字制度合本國語製女真字行之後復製女真小字謂固新所製為大字云二年三月遼復遣使如金議冊禮金不許先是遼遣蕭錫里持冊蒙如金金遣烏凌噶贊謨



持冊副本報遼遼以金所定大聖二字與先世稱號同  
遣錫里往議金主怒謂其臣曰遼人屢敗遣使求成  
惟飾虛詞以為緩師之計當議進兵乃令咸州路統軍  
司治軍旅修器械將以四月進師令色格爾留兵一千鎮  
守多昂摩以餘兵來會于渾河和議遂絕 五月金主自

將攻遼上京以遼使蕭錫里宋使趙良嗣從遣降者  
瑪伊持詔諭城中使速降遼主方獵于瑚圖哩巴山聞金  
舉兵命耶律博碩布等選精兵三千以濟師金主進攻

且謂錫里趙良嗣曰汝可觀吾用兵以卜去就遂臨城督戰諸軍鼓譟而進自旦及已多昂摩等以麾下先登克其外城留守托卜嘉以城降良嗣等奉觴為壽皆稱萬歲金主乃還

三年二月遼都統耶律伊都叛降金初遼主四子長趙王錫里次晉王阿嚠罕次秦王定次許王寧晉王文妃蕭氏所生積有人望女真興兵境內郡縣所失幾半而遼主畋遊不恤忠臣多被疎斥文妃作歌諷諫遼主

銜之樞密使蕭奉先元妃之兄而秦王許王之舅也以  
國人屬意晉王恐秦王不得立因潛圖之文妃姊適耶  
律達哈拉妹適耶律伊都一日其姊若妹俱會軍前奉  
先諷人誣文妃與駙馬蕭昱及伊都達哈拉等謀立晉  
王而尊遼主為太上皇遼主遂誅蕭昱達哈拉等而賜  
文妃死伊都在軍中聞之大懼即率千餘騎叛降於金  
遼主遣蕭錫默等將兵追之及諸閭山縣錫默等謀曰  
主上信蕭奉先奉先視吾輩蔑如也伊都乃宗室豪俊

當不肯為奉先下若擒伊都他日吾黨皆伊都也不若  
縱之還即給曰追不及伊都至金金主見之因詔咸州  
都統司曰自伊都來灼見遼國事宜已決議親征其治  
軍以俟師期十一月金侵遼中京初耶律伊都奔金  
金尼瑪哈言于金主曰遼主失德中外離心今乘其釁  
可襲取中京天時人事不可失也金主然之群臣言時  
方寒金主不聽竟用尼瑪哈計以舍音都統內外諸軍  
普嘉努尼瑪哈幹布幹刺布博勒郭等副之耶律伊都

為鄉導以趨遼中京大定府

四年春正月金克遼中京遂下澤州遼主時獵于鴛鴦  
灤伊都引洛索奄至遼主憂甚樞密使蕭奉先曰伊都  
乃王子班之苗裔此來欲立甥晉王阿嚙罕耳若為社  
稷計不惜一子明其罪誅之可不戰而伊都自退矣會  
耶律薩巴等復謀立阿嚙罕事覺遼主召樞密使蕭達  
爾丹等議曰反者必以此兒為名若不除去何以獲安  
達爾丹唯唯遼主乃遣人縊之或勸阿嚙罕亡阿嚙罕

曰安忍為叢爾之軀而失臣子之節遂就死遼主素服  
三日耶律薩巴等皆伏誅阿嚙罕素有人望諸軍聞其  
死無不流涕由是人心解體伊都引金兵逼遼主行宮  
遼主率衛士五千餘騎自駕鴛鴦灤走雲中遺傳國璽於  
桑乾河 三月金尼瑪哈敗遼奚王于北安州拔其城  
遣固新略近地獲遼護衛錫里知遼上下離心使人  
報舍音曰遼主窮迫若失機會事難圖矣舍音意未決  
幹布勸從之舍音乃出青嶺尼瑪哈出瓢嶺期會于羊

城濼遼主在雲中以金兵為憂蕭奉先猶言女真雖能  
攻我上京終不能遠離巢穴及聞金師將出嶺西遼主  
遂趨白水濼尼瑪哈以精兵六千襲之將近行營遼主  
計不知所出遂乘輕騎入夾山始悟奉先之不忠怒曰  
汝父子誤我至此殺爾何益恐軍心忿怒爾曹避敵苟  
安禍必及我其勿從行奉先下馬哭拜而去行未數里  
左右執其父子縛送金軍金人斬其長子昂以奉先及  
其次子昱械送金主道遇遼軍奪以歸並賜死蕭達爾

丹自知不免亦絕食死 丙子遼人立秦晉國王耶律

淳為帝初遼主走雲中留南府宰相張琳叅知政事李  
處溫與耶律淳守燕京處溫聞遼主入夾山命令不通  
即與族弟處能及子爽外假怨軍內結都統蕭幹謀立  
淳處溫邀張琳白其事琳曰攝政則可即真則不可處  
溫曰今日之事天意人心已定豈可易也琳不敢執遂  
與諸大臣耶律達什左企弓虞仲文曹義勇康公弼集  
蕃漢百官諸軍及父老數萬人詣淳府引唐靈武故事



勸進淳不許將出李奭持赭袍被之令百官拜舞山呼  
淳驚駭再三辭不獲從之群臣上尊號曰天錫皇帝建  
元天福以妻蕭氏為德妃妃普賢女也加處溫守太尉  
張琳守太師餘與謀者授官有差改怨軍為常勝軍軍  
旅之事悉委達什遙降遼主為湘陰王遂據有燕雲中  
及上京遼西之地遼主所有沙漠以北西南西北路兩  
都招討府諸蕃族而已淳遣使來報免歲幣結好亦遣  
使奉表於金乞為附庸金人不報耶律達什者太祖八

世孫通遼漢字善騎射登進士第累擢翰林學士承旨  
遼謂翰林為林牙故稱達什林牙 金人攻遼西京大

同府遼耿守中救之尼瑪哈錫里庫幹布等繼至尼瑪  
哈率麾下自其中衝擊使餘兵去馬從旁射之守忠大  
敗其衆殲焉西京西路州縣部族皆降金 夏四月金  
取遼東勝州獲阿蘇至金金人杖而釋之 六月遼耶  
律淳寢疾聞遼主傳檄天德雲內朔武應蔚等州合諸  
蕃精騎五萬約以八月入燕并遣人問勞索衣裘茗藥

淳甚驚命北南面大臣議李處溫蕭幹等有迎秦王定拒湘陰王之說惟南面行營都部署耶律寧曰天祚果能以諸蕃兵大舉奪燕則是天數未盡豈能拒之否則秦湘父子也安有迎子而拒其父者處溫等以寧扇亂軍心欲殺之淳曰彼忠臣也焉可殺天祚果來吾有死耳復何面目相見耶已而淳疾自知不起密授處溫蕭幹馬步軍都元帥意將屬以後事及蕭幹等召宰執入議處溫稱疾不至陰聚勇士為備給云奉密旨防他變

淳死蕭幹等乃立淳妻為皇太后主軍國事奉遺命遙立秦王定為帝蕭后遂稱制改元德興謚淳為孝章皇帝廟號宣宗墓于燕西之香山蕭后聽政幹以后命名處溫至以時方多難未即加誅但追毀元帥劄子處溫父子懼禍南通童貫欲挾蕭后納土北通于金欲為內應事覺后執處溫問之處溫自陳有定策功后曰誤秦晉國王者皆爾父子何功之有併數其前罪惡數十處溫無以對乃賜死鬻其子奭而磔之籍其家得錢七萬

緡金玉寶器稱是皆為宰相數月間所取也夏主使李  
良輔將兵三萬救遼金將幹魯洛索敗之于宣水追至  
野谷澗水暴至夏人漂沒者不可勝計 八月金阿固

達襲遼延禧于錫訥圖延禧敗走時遼主既失西京及  
沙漠以南遂奔于鄂索勒金舍音使幹喇布言于金主  
曰今雲中新定諸路遼兵尚數萬新降之民其心未固  
諸將望幸軍中金主從之既而聞遼主在大漁濼乃  
自將精兵萬人襲之普嘉努幹喇布率兵四千為前鋒

晝夜兼行及遼主至錫訥圖軍士至者才千人遼兵二萬五千方治營壘普嘉努與諸將議耶律伊都曰我軍未集人馬疲劇未可戰也幹喇布曰今追及遼主而不亟戰日入而遁則無及矣遂戰短兵接遼兵圍之數重副統軍蕭特烈諭軍中以君臣之義士皆殊死戰遼主謂幹喇布兵少必敗遂與妃嬪登高阜觀戰伊都指遼主麾蓋以示諸將幹喇布等遂以騎兵馳赴之遼主望見大驚即遁去遼兵遂潰幹喇布等還金主曰遼主去

不遠盍亟追之幹喇布追至鄂勒錐圖遼主棄輜重而

遁蕭特烈被執 十二月金克遼燕京時金主分三道

進兵攻燕遼蕭后五上表于金求立秦王定金主不許

遼人遂以勁兵守居庸關金兵至關崖石自崩戍卒多

壓死遼人不戰而潰金兵度關而南遼統軍都監高陸

等送款于金金主至燕京遂自南門入使尼楚赫洛索

陳于城上金主次城南遼宰相左企弓叅政虞仲文康

公弼樞密使曹義勇張彥忠劉彥宗等奉表詣金營請

罪金主並釋之命守舊職而遣左企弓等撫定燕京諸州縣蕭德妃與蕭幹自古北口趨天德於是遼五京悉為金有

五年春正月遼知北院樞密事奚和勒博即箭筈山自立為奚國皇帝改元天復以奚漢渤海三樞密院改東西節度使為二王分司遼主命都統耶律瑪格討之

二月遼主奔四部族蕭德妃來見遼主怒殺之追降淳為庶人而赦其黨蕭幹奔奚夏四月金以幹魯為都



統幹喇布副之使襲遼主于陰山至居庸獲耶律達什  
幹魯使幹喇布尼楚赫洛索等以兵三千分道襲遼主  
將至青塚遇泥濘不能進幹喇布以繩繫達什使為鄉  
導直趨遼主營幹魯等大軍繼至時遼主往應州其子  
秦王定許王寧及諸妃女併從臣皆被執盡失輜重萬  
餘乘惟太保特默格竊遼主次子梁王雅里及長女特  
里乘軍亂出赴遼主軍得免幹魯兵至索勒敏為書招  
遼主遼主自金城來聞金人以所獲東去乃率兵五千

餘邀戰于白水灤幹喇布以兵千餘敗之遼主遁去金人獲遼主長子趙王錫里追奔二十餘里盡得其從馬別獲遼牧馬萬四千匹車八千乘遼主使人持兔紐金印偽請降于金而西走雲內幹喇布復以書招遼主諭以石晉北遷事遼主答書乞為弟若子量賜土地幹喇布不許五月夏主李乾順遣使請遼主臨其國遼主從之中軍都統蕭特烈等切諫不從遂渡河次于金肅軍北人情惶懼不知所為特烈陰謂耶律額哲曰事勢

如此億兆離心正我輩效節之秋不早為計柰社稷何  
乃共劫遼主第二子梁王雅里走西北部三日遂立為  
帝改元神厯以特烈為樞密使特默格副之奚和勒  
博為其下所殺金遣使如夏時幹喇布趨天德聞夏  
迎護遼主已渡河乃遺書於夏使執送遼主且許割地  
八月金主阿古達去燕京有疾命尼瑪哈為都統普  
嘉努幹魯副之駐兵雲中以備邊而還至布圖濬殂固  
倫貝勒舍音等請阿固達弟阿木班貝勒烏奇邁即

位更名晟改元天會謚阿固達曰大聖武元皇帝廟號  
太祖以舍音為阿木班貝勒幹布為固倫貝勒輔政  
幹布阿固達庶長子也冬十月遼雅里死蕭特烈等復  
立耶律珠爾為帝珠爾興宗孫也 十一月遼珠爾及  
蕭特烈為亂兵所殺

六年春正月夏遣把哩公亮請以事遼之禮稱藩于金  
且受地尼瑪哈承制割下寨以北陰山以南伊錫伊喇  
部圖嚕灤西之地與之自是兩國信使不絕 秋七月

遼主延禧復渡河居於圖魯卜部耶律達什自金來歸  
遼主責之曰我在汝何敢立淳達什對曰陛下以全國  
之勢不能一拒敵棄國遠遁使黎民塗炭即立十淳皆  
太祖子孫豈不勝乞命于他人耶遼主無以荅賜酒食  
而赦之 金襲遼主營遼主北走有瑪克錫者迎遼主  
至其部事之甚謹遼主遂得至烏迪里部遼主得耶律  
達什及瑪克錫之兵自謂有天助再謀出兵收復燕雲  
達什諫曰向以全師不謀戰備使舉國皆為金有國勢

至此而方求戰非計也當養兵待時而動不可輕舉遼主不從與金人戰敗走山陰

七年春正月遼主延禧謀奔夏會党項呼沙掄遣人請遼主臨其地遼主遂趨天德過沙漠金兵忽至遼主徒步走出乘從者馬得脫途次絕糧從者至嚙冰雪以濟饑過天德至夜將宿民家給曰偵騎其家知之乃叩頭跪而大慟潛宿其家遂趨党項以呼沙掄為西南面招討使總知軍事 二月遼主至應州新城東六十里為

金將洛索等所獲以歸 八月廢延禧為海濱王遼遂

亡 遼耶律達什稱帝于克呼木先是達什以諫遼主

不從遂殺北院樞密蕭伊錫自立為王率衆西走至哈

吞城駐于北庭都護府會西鄙七州十八部諭以興復

事得精兵萬餘置官吏立排甲具器械又遺書假道于

回鶻王伯勒格伯勒格得書即迎至邨願質子孫為附

庸送至境外所過敵者勝之降者安之兵行萬里歸者

數國獲牛羊駝馬不可勝計至塔什罕西域諸國舉兵

十萬號呼爾察來拒戰達什分所部為三軍進擊大敗之僵屍數十里駐兵塔什罕凡九十日回回國王來降貢方物又西行至克呼木羣臣共冊立達什為帝改元延慶號曰天祐皇帝妻蕭氏為昭德皇后是為西遼

復燕雲

徽宗政和元年九月遣端明殿大學士鄭允中及宦者童貫使遼童貫既得志于西羗遂謂遼亦可圖因請使遼以覘之乃以鄭允中充賀遼主生辰使而以貫副之或



言以宦官為上介國無人乎帝曰契丹聞貫破羗故欲見之因使覘其國策之善者也遂行冬十月童貫以遼李良嗣來命為秘書丞賜姓趙燕人馬植本遼大族仕至光祿卿行汚而內亂不齒于人童貫使遼道廬溝植夜見其侍史自言有滅燕之策因得見貫貫與語大奇之載與俱歸易姓名曰李良嗣薦諸朝植即獻策曰女真恨遼人切骨而天祚荒淫失道本朝若自登萊涉海結好女真與之相約攻遼其國可圖也議者謂祖宗

以來雖有此道以其地接諸蕃禁商賈舟船不得行百有餘年矣一旦啟之懼非中國之利不聽帝召問之植對曰遼國必亡陛下念舊民塗炭之苦復中國往昔之疆代天譴謫以治伐亂王師一出必壺漿來迎萬一女真得志事不侔矣帝嘉納之賜姓趙氏以為秘書丞圖燕之議自此始

重和元年二月遣武義大夫馬政浮海使金約夾攻遼初建隆中女真嘗自國之蘇州泛海至登州賣馬故道

猶存至是有漢人高藥師者泛海來言女真建國屢破  
遼師登州守臣王師中以聞詔蔡京童貫共議命師中  
募人同藥師等賫市馬詔以往不能達而還帝乃復委  
童貫選人使之遂使馬政同藥師由海道如金政言於  
金主曰主上聞貴朝攻破契丹五十餘城欲與通好共  
行吊伐若允許後當遣使來議自是始通金好

宣和元年春正月金主與尼瑪哈議遣渤海人李善慶  
女真索都持國書并北珠生金等物同馬政來修好詔

蔡京等諭以夾攻遼之意善慶等唯唯居十餘日遣政  
同趙有開賫詔及禮物與善慶等渡海報聘行至登州  
有開死會謀者言遼已封金主為帝乃詔政勿行止遣  
平海軍校呼慶送善慶等歸金主遣慶歸且語之曰  
吾已獲遼數路汝歸見皇帝果欲結好早示國書若仍  
用詔決難從也初高麗來求醫帝命二醫往至是歸奏  
云高麗館醫甚勤日夕引之視其用兵布陣禦敵之方  
曰聞天子將與女真圖契丹苟存契丹猶足為中國捍

邊女真如虎不可交也宜早為之備帝聞之不樂安  
堯臣上言陛下臨御之初嘗下詔求言於是諤士效忠  
而憸人乃誤陛下加以詆誣之罪使陛下負拒諫之謗  
故比年天下杜口以言為諱乃者宦寺交結權臣共倡  
北伐而宰執以下無一人肯為陛下言者臣謂燕雲之  
後興則邊釁遂開宦寺之權重則皇綱不振昔秦始皇  
築長城漢武帝通西域隋煬帝遼左之師唐明皇幽薊  
之寇其失如彼周宣王伐玁狁漢文帝備北邊元帝納

賈捐之議光武斥臧宮馬武之謀其得如此藝祖撥亂反正躬擐甲冑當時將相大臣皆所與取天下者豈勇畧智力不能下幽燕哉蓋以區區之地契丹所必爭恐使吾民重困鋒鏑章聖澶淵之役與之戰而勝乃聽其和亦欲固本而息民也今童貫深結蔡京同納趙良嗣以為謀主故建平燕之議臣恐異時唇亡齒寒邊境有可乘之釁狼子蓄銳伺隙以逞其欲此臣之所以日夜寒心伏望思祖宗積累之艱難歷代君臣之得失杜

塞邊隙務守舊好無使外夷乘間窺中國上以安宗廟  
下以慰生靈帝然之且以言路久壅宜導以賞予補承  
務郎後竟為奸謀所奪

二年二月乙亥遣趙良嗣使金先是呼慶自金還具道  
金主言并持其書來請別遣使通好時童貫密受旨圖  
燕因建議遣右文殿修撰趙良嗣往仍以市馬為名其  
實約攻遼以取燕雲之地八月金人來議攻遼及歲  
幣遣馬政報之初趙良嗣謂金主曰燕本漢地欲夾攻遼

使金取中京大定府宋取燕京析津府金主許之遂議  
歲幣金主因以手札付良嗣約金兵自平地松林趨古  
北口宋兵自白溝夾攻不然不能從因遣貝勒偕良嗣  
還以致其言帝使馬政報聘書云大宋皇帝致書於大  
金皇帝遠承信介特示函書致討契丹當如來約已差  
童貫勒兵相應彼此兵不得過關歲幣之數同于遼仍  
約毋聽契丹講和

四年三月金人來約夾攻遼命童貫為河北河東路宣



撫使屯兵於邊以應之初熙河鈴轄趙隆嘗極言其不可童貫曰君能共此當有殊拜隆曰隆武夫豈敢干賞以敗祖宗二百年之好異時啓釁萬死不足謝責貫不悅鄭居中亦力陳不可謂蔡京曰公為大臣不能守兩國盟約輒造事端誠非廟筭京曰上厭歲幣五十萬故爾居中曰公獨不思漢世和戎用兵之費乎使百萬生靈肝腦塗地公實為之由是議寢及金數敗遼兵童貫乃復乞舉兵居中又言不宜幸災而動待其自斃可也

時睦寇初平帝亦悔於用兵王黼獨言曰中國與遼雖為兄弟之邦然百餘年間彼之所以開邊慢我者多矣且兼弱攻昧武之善經也今而不取燕雲女真即強中原故地將不復為我有帝遂決意治兵黼於三省置經撫房專治邊事不關樞密括天下丁夫計口出算得錢六千二百萬緡以充用黼又遺童賁書曰太師若北行願盡死力會聞耶律淳自立乃命賁勒兵十五萬巡北邊以應金且招諭幽燕蔡攸副之仍以三策付賁如燕

人悅而取之因復舊疆土上也耶律淳納款稱藩次也  
燕人未服按兵巡邊下也中書舍人宇文虛中上書言  
臣聞用兵之策必先計強弱虛實知彼知己以圖萬全  
今論財用之多寡指宣撫司所置便為財用有餘若沿  
邊諸郡帑藏空虛廩食不繼則畧而不問論士卒之強  
弱指宣撫司所駐便言兵甲精銳若沿邊諸郡士不練  
習武備刳缺則置而不講夫邊圉無應敵之具軍府無  
數日之糧雖孫吳復生亦未可舉師是在我者未有萬

全之策也用兵之道禦攻者易攻人者難守城者易攻城者難守者在內而攻者在外在內為主而常逸在外為客而常勞逸者必安勞者必危今宣撫司兵約有六萬邊鄙可用不過數千契丹九大王耶律淳者智畧輻湊素得士心國主委任信而不疑今欲亟進兵於燕城之下使契丹自西山以輕兵絕吾糧道又自營平以重兵壓我營壘我之糧道不繼而耶律淳者激勵衆心堅城自守則我亦危殆矣是在彼者未有必勝之道也夫

在我無萬全之策在彼亦未可必勝茲事一舉乃安危存亡之所繫豈可輕議乎且中國與契丹講和今踰百年間有貪恠不過欲得關南十縣而止耳間有傲慢不過對中國使人稍虧禮節而止耳自女真侵削以來向慕本朝一切恭順今舍恭順之契丹不封植拯救為我藩籬而遠踰海外引强悍之女真以為隣國彼既藉百勝之勢虛喝驕矜不可以禮義服也不可以言說喻也視中國與契丹拏兵不止鏖戰不解勝負未決强弱未

分持卞莊兩鬪之說引兵踰古北口撫有悖桀之衆繫  
累契丹君臣雄據朔漠貪心不止越逸疆圉憑凌中夏  
以百年怠惰之兵而當新銳難敵之衆以寡謀持重久  
安閒逸之將而角逐於血肉之林巧拙異謀勇怯異勢  
臣恐中國之邊患未有寧息之期也譬猶富人有萬金  
之產與寒士為隣欲肆并吞以廣其居乃引強盜而謀  
曰彼之所處汝居其半彼之所畜汝取其全強盜從之  
寒士既亡雖有萬金之富日為切隣強盜所窺欲一夕

高枕安卧其可得乎愚見竊以為確喻望陛下思祖宗  
創業之艱難念邦域百年之盟好下臣此章使百寮廷  
議儻臣言可採乞降詔旨罷將帥還朝無滋邊隙俾中  
國衣冠禮義之俗永覩昇平天下幸甚書下三省黼讀  
之大怒摺撫他事除集英殿修撰督戰益急而北事始  
不可收拾矣五月乙亥以蔡攸為河北河東宣撫副  
使與童貫共勒兵攸童駭不習事謂功業可唾手致陛  
辭值二美嬪侍帝側攸指而請曰臣成功歸乞以是賞

帝笑而弗責 庚辰童貫至高陽關用知雄州和詵計

降黃榜及旗述吊民伐罪之意且云若有豪傑能以燕

京來獻者即除節度使遂命都統制种師道護諸將進

兵師道諫曰今日之舉譬如盜入隣家不能救又乘之

而分其室焉無乃不可乎貫不聽分兵為兩道師道總

東路兵趨白溝辛興宗總西路兵趨范村癸未耶律淳

聞之遣耶律達什蕭幹禦之師道次白溝遼人譟而前

擊敗師道前軍統制楊可世于蘭溝甸士卒多傷師道



先令又持一大挺自防賴以不大敗丁亥辛興宗亦敗于范村 六月己丑种師道退保雄州遼人追擊至城下帝聞兵敗懼甚詔班師遼使來言曰女真之叛本朝亦南朝之所惡也今射一時之利棄百年之好結豺狼之隣基他日之禍謂為得計可乎救災恤隣古今通誼惟大國圖之貫不能對种師道復請許之和貫不答而密劾師道助賊王黼怒責授師道右衛將軍致仕 秋七月王黼聞耶律淳死復命童貫蔡攸治兵以河陽三

城節度使劉延慶為都統制 九月戊午除朝散郎宋

昭名昭上書極言遼不可攻金不可隣異時金必敗盟

為中國患乞誅王黼童貫趙良嗣等且曰兩國之誓敗

盟者禍及九族陛下以孝理天下其忍忘列聖之靈乎

陛下以仁覆天下其忍置河北之民於塗炭之中而使

肝腦塗地乎王黼大惡之故除昭名勒停廣南編管

己未金人聞童貫舉兵恐朝廷徑取燕而歲幣不可得

乃遣圖呼濟烏克等來議師期帝遣趙良嗣報之且言

不負初約 己卯遼將郭藥師以涿易二州來降時藥  
師為遼常勝軍帥留守涿州以蕭后立蕭幹專政國人  
多貳謂所部曰天祚失國女政不綱宋天子重兵壓境  
此男兒取金印時也遂擁所部八千人奉二州來降童  
貫受之以聞詔授恩州觀察使以兵隸劉延慶 冬十  
月改燕京為燕山府涿易八州並賜名 癸巳童貫遣  
劉延慶郭藥師將兵十萬出雄州以郭藥師為鄉導渡  
白溝延慶軍無紀律藥師諫曰今大軍拔隊行而不設

備若敵人置伏邀擊首尾不相應則望塵奔潰矣不聽  
至良鄉遼蕭幹率衆來拒延慶與戰而敗遂閉壘不出  
藥師曰幹兵不過萬人今悉力拒我燕山必虛願得奇  
兵五千倍道襲之城可得也因請延慶子光世簡師為  
後繼延慶許之遣大將高世宣楊可世與藥師率兵六  
千夜半渡盧溝而進質明常勝軍帥甄五臣領五千騎  
奪迎春門以入藥師等繼至遣人諭蕭后后密報蕭幹  
幹舉精甲三千還燕巷戰光世渝約不至藥師失援而

敗與可世棄馬縋城而出死傷過半世宣死焉延慶營  
于盧溝南幹分兵斷餉道擒護糧將王淵得漢軍二人  
蔽其目留帳中夜半偽相語曰吾師三倍漢軍敵之有  
餘當分左右翼以精兵衝其中左右翼為應舉火為期  
殲之無遺既言乃陰逸一人歸報延慶聞而信之明旦  
見火起以為敵至即燒營遁士卒蹂踐死者百餘里幹  
因縱兵追至涿水而去自熙豐以來所儲軍實殆盡退  
保雄州燕人知宋之無能為作賦及歌詩以誚之樂師

還猶進安遠軍承宣使 十一月戊寅金人來議燕地

十二月戊子遣趙良嗣復如金初朝廷與金約但求石晉賂契丹故地而不思平營灤三州非晉賂乃劉仁恭獻契丹以求援者既而王黼悔欲併得之金主不肯及趙良嗣往金主使普嘉努責良嗣以出兵失期且云今更不論元約特與燕京薊景檀順涿易六州良嗣言元約山前山後十七州今乃如此信義安在抗辯數四金人不從良嗣乃與其使李靖偕來止許山前六州帝

復遣良嗣送之且求營平灤三州 庚寅加郭藥師武  
泰節度使 辛卯金克遼燕京時童貫再舉伐燕不克  
成功懼得罪乃密遣王瓌如金以求如約夾攻金主分  
三道進兵遂克燕遣騎兵趙良嗣還且致遼俘

五年春正月戊午金遣使來趙良嗣復如金初良嗣至  
燕與金主議燕京西京之地金主曰若宋必欲平灤等  
州并燕京不與因以答書先示良嗣讀至燕京用本朝  
兵力攻下其租稅當輸本朝良嗣因曰租稅隨地豈有

與其地而不與其租稅者尼瑪哈曰燕京自我得之則  
當歸我若不蚤見與請速追涿易之師無留我疆乃遣  
李靖等與良嗣偕來靖既入對遂見王黼黼謂靖曰租  
稅非約也上意以交好之故欲以銀絹充之靖復請去  
年歲幣帝亦特許之故仍命良嗣與靖偕使 辛酉以  
王安中知燕山府郭藥師同知府事時朝廷以金人將  
歸燕謀帥臣守之左丞王安中請行王黼贊於帝遂授  
安中慶遠軍節度使河北河東燕山府路宣撫使知燕



山府郭藥師為檢校少保同知府事詔藥師入朝禮遇甚厚賜以甲第姬妾張水嬉使觀之命貴戚大臣更互設宴又召對於後苑延春殿藥師拜庭下泣言臣在敵中聞趙皇如在天上不謂今日得望龍顏帝深褒稱之委以守燕對曰願效死又令取天祚以絕燕人之望藥師變色言曰天祚故主也國破出走臣是以降陛下使臣畢命他所不敢辭若使反故主非所以事陛下願以付他人因涕泣如雨帝以為忠解所御珠袍及二金盆

以賜藥師出諭其下曰此非吾功汝輩力也即剪盆分給之加檢校少傅歸鎮燕山府路三月己未遣使如金初趙良嗣至燕謂金主曰本朝狗大國多矣豈平灤一事不能相從耶金主曰平灤欲作邊鎮不可得也遂議租税金主曰燕租六百萬止取一百萬不然還我涿易舊疆及常勝軍我且提兵按邊良嗣曰本朝自以兵下涿易今乃云爾豈無曲直邪且言御筆許十萬至二十萬不敢擅增乃令良嗣歸報金主謂之曰過半月不

至吾提兵往矣時左企弓嘗以詩獻金主曰君王莫聽  
捐燕議一寸山河一寸金故金人欲背初約要求不已  
良嗣既還金聞遼主謀復故地乃悉斷盧溝北橋梁焚  
次舍以防之良嗣行至雄州以金書遞奏其畧言貴朝  
兵不克夾攻特用已力下燕所以拘稅今據燕管內每  
年租六百萬貫良嗣等稱御筆許二十萬以上不敢自  
專其平灤等州不在許限儻務侵求難終信義仍速追  
過界之兵王黼欲功之速成乃請復遣良嗣自雄州再

往使許遼人舊歲幣四十萬之外每歲更加燕京代稅錢一百萬緡及議畫疆與遣使賀正旦生辰置榷場交易金主大喜遂使尼楚赫等持誓書草來許以燕京及六州來歸而山後諸州及西北一帶接連山川不在許與之限帝曲意從之遣盧益趙良嗣等持誓書往至涿州金固新等先索書觀之言其字畫不謹令易之益言帝親書所以示尊崇於大國也金人不聽比至汴京更易者數四金人又言近有燕人趙溫訊等逃出南朝須

先還方可議交燕地良嗣諭宣撫司縛送溫訊於金既  
至尼瑪哈釋其縛而用之金人又求糧良嗣許以二十  
萬石夏四月癸巳金人使楊璞以誓書及燕京六州  
來歸其平營灤三州終以非石晉所賂契丹之地不預  
庚子命童貫蔡攸入燕交割時燕之職官富民金帛子  
女皆為金人盡掠而去惟存空城而已尼瑪哈猶欲止  
割涿易金主曰海上之盟不可忘也我死汝則為之乙  
巳童貫等奏燕城老幼迎謁焚香稱壽庚戌帝曲赦兩

河燕雲命即日班師 五月庚申以王黼為太傅鄭居

中為太保癸亥進封童貫為徐豫國公蔡攸為少師時

王黼竭天下之財以北征僅得七空城至是率百官表

賀詔以收復燕雲故宰執皆進位而命王黼總治三省

事賜玉帶以趙良嗣為延康殿學士鄭居中自陳無功

不拜 六月丙戌遼張鼓以平州來歸初遼主之走西

山也平州軍亂殺其節度使蕭廸里鼓撫安亂者州民

推鼓領州事耶律淳死鼓知遼必亡乃籍壯丁五萬人

馬千匹練兵為備蕭德妃遣時立愛知平州鼓拒弗納  
金人入燕京訪鼓情狀于康公弼公弼曰鼓狂妄寡謀  
何能為當示以不疑金人遂加鼓臨海軍節度仍知平  
州既而尼瑪哈又欲先下平州擒張鼓公弼曰若加兵  
是趣之叛也公弼請自往覘之鼓曰契丹八路七路已  
降今獨平州存敢有異志所以未解甲者防蕭幹耳厚  
賂公弼使還公弼還言於尼瑪哈曰彼無足慮也乃昇  
平州為南京加鼓試中書平章事判留守事至是金驅

遼宰相左企弓虞仲文曹義勇康公弼同燕京大家富  
民俱東徙燕民流離道路不勝其苦過平州遂入城言  
於鼓曰左企弓不能守燕致吾民流離至此公今臨巨  
鎮握強兵盡忠於遼使我復歸鄉土人心亦惟公是望  
鼓遂召諸將議皆曰聞天祚兵勢復振出沒漠南公若  
仗義勤王奉迎天祚以圖興復先責左企弓等叛降之罪  
而誅之盡歸燕民使復其業而以平州歸宋則宋無不  
接納平州遂為藩鎮矣即後日金人加兵內用平州之



衆外藉宋人之援又何懼焉鼓又訪於翰林學士李石亦以為然鼓乃遣張謙率五百餘騎傳留守令召左企弓虞仲文曹義勇康公弼至灤河西岸數企弓等十罪皆縊殺之鼓仍稱保大三年畫天祚像朝夕謂事必告而後行稱遼官秩榜諭燕人復業恒產為常勝軍所占者悉還之燕民既得歸大悅李石更名安弼偕故三司使高黨至燕京說王安中曰平州形勢之地張鼓總練之才足以禦金人安燕境幸招致之無令西迎天祚北

合蕭幹也安中深納之令安弼至汴以聞帝以手札付同知燕山府詹度第令羈縻之而度促穀內附穀乃遣張鈞張敦固持書來請降王黼勸帝納之趙良嗣諫曰國家新與金盟如此必失其懽後不可悔不聽良嗣坐削五階而詔安中及詹度厚加安撫與免三年常賦穀聞之自謂得計秋七月童貫致仕以內侍譚稹為兩河燕山路宣撫使時貫與蔡攸歸自燕頗失上意王黼梁師成共薦稹代貫交雲中之地稹至太原招弼應蔚

諸州降人為朔寧軍 八月遼蕭幹引兵破景薊州遂  
攻燕郭藥師與戰破之幹走死初金人既陷燕京幹就  
奚王府自立為帝國號大奚時奚人饑幹出盧龍嶺攻  
破景州又敗常勝軍於石門鎮陷薊州寇掠燕城其鋒  
銳甚有涉河犯京師之意人情洶洶頗有謀棄燕者已  
而藥師大破其衆乘勝窮追過盧龍殺傷大半幹遁去  
尋為其下所殺傳首京師詔加藥師太尉 冬十月詔  
建平州為太寧軍以張穀為節度使時金人聞穀叛遣

多昂摩率三千騎攻鼓鼓率兵拒之於營州多昂摩以兵少  
不交鋒而退鼓遂妄以大捷聞朝廷拜鼓節度使犒賞  
銀絹數萬 十一月金幹喇布攻平州圍之金人以多  
昂摩無功而還乃復使幹喇布督多昂摩攻平州會張鼓聞  
朝廷犒賜將至喜而遠迎幹喇布乘其無備襲之與鼓  
戰于城東鼓敗宵奔燕山王安中納而匿之平州都統  
張忠嗣及張敦固出降金金遣使與敦固入諭城中城  
中人殺其使者立敦固為都統閉門固守 詔殺張鼓

函首以畀金時金人以納叛來責朝廷初不欲發遣金人索之益急王安中取貌類鼓者斬其首與之金知非鼓也遂欲以兵攻燕安中言必不發遣懼起兵端朝廷不得已令安中縊殺之函其首併鼓二子送于金於是燕降將及常勝軍士皆泣下郭藥師曰金人欲鼓即與鼓若求藥師亦將與藥師乎安中懼因力求罷詔以蔡靖知燕山府事自是降將卒解體而金卒用此為兵端云金人來歸武朔州時朝廷以山後諸州請于金金主烏

奇邁新立將許之尼瑪哈自雲中至言于金主曰先帝  
初圖宋協力攻遼故許以燕地宋人既盟之後請加幣  
以求山西諸鎮先帝辭其幣而復與之盟曰無匿逋逃  
無擾邊民今宋數路招納叛亡累疏叛人姓名索之童  
貫不遣盟未期年已如是萬世守約其可望乎且西鄙  
未寧割付山西諸郡則諸軍失屯據之所將有經畧或  
難持久請勿與之金主遂遣使止以武朔二州來歸  
六年三月金人遣使詣宣撫司索趙良嗣所許糧二十

萬石譚稹曰二十萬石豈易致耶良嗣口許不足憑也  
遂不與金人由此大怒 六月金人克平州執張敦固  
殺之 詔以收復燕雲以來京都兩河之民困於調度  
令京西淮南兩浙江南荆湖四川閩廣並納免夫錢每  
夫三十貫委漕臣限督之違者從軍法又詔宗室戚里  
宰執之家及宮觀寺院一例均敷於是徧索天下所得  
纔二十萬緡而結怨四海矣 八月譚稹罷復以童貫  
領樞密院事兩河燕山路宣撫使初金人以拓跋故地

雲中二千里遺夏止以武朔二州來歸至是夏人舉兵  
侵武朔地界譚稹遣兵禦之兵數交夏師不即退又金  
人以朝廷納張穀不給糧遂攻應蔚逐守臣朝廷罪稹  
措置乖方詔致仕以貫代之時遼主延禧在夾山帝欲  
誘致之始遣一番僧齋御筆絹書通意及延禧許歸遂  
易書為詔許待以皇帝之禮位燕越二王上築第千間女  
樂三百人延禧大喜貫之是行名為代稹交割山後土  
地其實已約延禧來降自往迎之也然延禧以中國不



足恃卒不至 是月以復燕雲赦天下

七年六月封童貫廣陽郡王帝援神宗遺訓能復全燕之境者胙土錫以王爵封貫為王

方臘之亂

宋江附

徽宗宣和二年冬睦州清溪民方臘作亂方臘世居縣  
竭村託左道以惑衆初唐永徽中睦州女子陳碩真反  
自稱文佳皇帝故其地相傳有天子基臘因得憑藉以  
自信縣境梓桐幫源諸洞皆落山谷幽險處民物繁夥

有漆楮杉材之饒富商巨賈多往來臘有漆園造作局  
屢酷取之臘怨而未敢發時朱勔花石綱之擾比屋致  
怨臘因民不忍陰聚貧乏遊手之徒以誅勔為名遂作  
亂自號聖公建元永樂置官吏將帥以中飾為別自紅  
而上凡六等無弓矢甲冑惟以鬼神詭秘事相扇誅焚  
室廬掠金帛子女誘脅良民為兵人安於太平不識金  
革聞金鼓聲即斂手聽命不旬日聚兵數萬兩浙都監  
蔡遵顏坦擊之皆敗死於息坑 十二月臘攻陷青溪

遂陷睦歙州東南將郭師中戰死北掠桐廬富陽諸縣  
進逼杭州郡守趙霽棄城走州陷殺制置使陳建廉訪使  
趙約縱火六日死者不可勝計凡得官吏必斷鬻支體  
探其肺腸或熬以膏油叢鏑亂射備盡楚毒以償怨心  
警奏至京師時方聚兵以圖北伐王黼匿不以聞於是  
凶焰日熾附者益衆東南大震淮南發運使陳邁上言  
臘衆強東南兵弱乞調京畿兵及鼎澧槍牌手兼程以  
來使不至滋蔓帝得疏始大驚乃罷北伐之議詔以童

貫為江淮荆浙宣撫使譚稹為兩浙制置使率禁旅及秦晉番漢兵十五萬討之

三年春正月方臘陷婺州又陷衢州衢守彭汝方被執罵賊而死賊屠其城 二月方臘陷處州又遣其將方

七佛引衆六萬寇秀州統軍王子武禦之會大軍至合擊賊斬首九千賊還據杭州 夏四月童貫合兵擊方

臘破之執臘以歸童貫譚稹前鋒至清河堰水陸並進屢擊破方臘臘焚官舍府庫民居宵遁還清河幫源洞

諸將劉延慶王稟王煥楊惟忠辛興宗王淵等相繼至  
盡復所陷城貫等合兵擊臘於幫源洞臘衆尚二十萬  
與官軍力戰深據岩屋為三窟諸將莫知所入王淵裨  
將韓世忠潛行溪谷問野婦得徑即挺身直前渡險數  
里擣其穴格殺數十人擒臘以出辛興宗領兵截洞口  
掠為已功併取臘妻子及偽相方肥等其衆遂潰臘之  
亂凡破六州五十二縣戕平民二百萬所掠婦女自賊  
洞逃出裸而縊於林中者相望百餘里 五月安置御

史中丞陳過庭於黃州過庭以睦寇竊發上言致寇者  
蔡京養寇者王黼竄二人則寇自平又言朱勔父子本  
刑餘小人交結權幸竊取名器罪惡盈積宜正典刑以  
謝天下三人聞而憾之故貶 八月加童貫太師封楚  
國公賞平方臘功也方臘伏誅改睦州為嚴州歙州為  
徽州

宣和三年二月淮南盜宋江寇京東州郡至海州張叔  
夜敗之江乃降宋江起為盜以三十六人橫行河朔轉

掠十郡官軍莫敢撓其鋒知亳州侯蒙上書言江才必有過人者不若赦之使討方臘以自贖帝命蒙知東平府未赴而卒又命張叔夜知海州江將至海州叔夜使間者覘所向江徑趨海濱劫巨舟十餘載鹵獲叔夜募死士得千人設伏近城而出輕兵距海誘之戰先匿壯卒海旁伺兵合舉火焚其舟賊聞之皆無鬪志伏兵乘之擒其副賊江乃降

宋史紀事本末卷十二





總校官編修臣朱 鈐

校對官編修臣孫希旦

膳錄監生臣張龍圻